

四庫全書

史部

欽定四庫全書

史部

欽定大清會典則例卷六十九

詳校官檢討臣劉 焯

編修臣程嘉謨覆勛

總校官原任中允臣王燕緒

校對官中書臣潘奕雋

謄錄監生臣湯汝梅

欽定四庫全書

欽定大清會典則例卷六十九

禮部

儀制清吏司

學校二

一諸生考課順治九年題準府州縣提調官員
宜嚴束生徒按季考校凡學內殿堂齋房等屋
損壞即辦料興工修理其齋夫膳夫學糧學田

等項以時撥給不許遲誤剋減生員除干謁瀆
擾外宜以禮相待勿得橫肆凌侮○十七年議
準湖廣平清偏鎮四衛赴貴州考試○康熙二
十七年覆準湖廣平溪清浪二衛距武昌二千
五百里赴試維艱仍令黔省考試○雍正元年
覆準學宮之內廣置齋舍多設廩膳凡屬生員
苟能勤加課藝互相砥礪則親師取友裨益良
多著直省學臣通飭府州縣衛教授學正教諭

訓導務立課程令其時至學宮面加考試如果有遊學遠館隨任等情教官不得借此苛求至新進生員尤為進身之初應照國子監坐監例令在學肄業俟下案新生至學為滿或有親老家貧勢不能在學肄業者亦必分題考校每月定期使無曠業學臣於按臨時即以文章之優劣定教職賢否○五年覆準嗣後令教官按月課四季季考生員除丁憂患病遊學有事故

外照定例嚴加考試如有托故不到者嚴加懲
治三次不到者詳革如該教官內果能實心訓
迪化導有方學臣即為舉薦若因循苟且視為
具文即題叅革退○六年覆準嗣後府學生員
百里以內者其月課仍在府學百里以外者在
州從州在縣從縣令州縣學教官帶理月課至
府學生員有干犯學規者亦許州縣學教官嚴
加約束其歲科考試幫補出貢丁憂起復等項

仍歸府學職掌○十二年覆準八旗人材英敏者多不可任其優游自便嗣後八旗生員遇歲科兩試務令各該旗都統飭令叅佐領及滿教官嚴傳赴試如果駐防各省隨任遠方及實繫患病一時不能赴考者本生豫呈教官教官加具印結申報學臣存案仍令八旗都統飭令叅領佐領於學臣按試文到之前將各本旗有事故不能到之生員逐一察明緣由出具印結申

報該都統行文知照學臣並飭發教官令其造具清冊注明某生駐防某省某生隨任某地或某生實因患病驗明加具印結申報學臣存案如該旗都統既無知照滿學教官又無文申報緣由一任該生捏辭托故抗不赴考扶同徇隱者一經察出將本生照例除名外仍將該管各官照徇庇例一并叅處○又

諭清釐八旗歲考不到生員原以杜規避之弊然不肖

旗員或借此生事苛求亦未可定著該都統轉飭叅領佐領秉公辦理倘有徇情朦溷及需索苦累等事該都統即行叅究欽此○乾隆元年覆準雍正五年定例士子每年四季季考按月月課考課不到者戒飭三次不到者詳革但三次月課為期不過三月士子或因住居遙遠不能如期赴課亦間有之嗣後月課三次不到者該學教官嚴傳戒飭其有並無事故終年不到者詳請褫革○

四年覆準嗣後學臣歲試滿學生員如有患病
事故者定限於科考時補考即科考時仍有患
病事故者定限於下次歲試補考統令該管官
詳細察覈並嚴加傳催務於限內補試再各省
駐防隨任之生員距京遙遠原與在籍諸生不
同若槩令赴京歲考其中多有未便若聽其竟
不歲考亦屬與例不符今酌議駐防隨任各生
有來京鄉試者即令補行歲試以符定制其因

路遠及有事故不能鄉試者仍照原議令該教官送具清冊注明某生駐防某省某生隨任某處加結申詳學臣存案但不許只應鄉試而不補歲考致滋規避之弊該旗員及該學教官亦不許借端苛索倘有詐稱駐防隨任及已經考過仍復羈留者明屬徇情朦溷即行叅處至隨任回旗之生員仍按欠考次數照例補考○又議準欠考各生各學政務令按次補考即於彙

報歲科學冊內分別注明以憑察覈如有欠考
數次只補一次及徑附正考等第者照徇情朦
溷例議處○又覆準文武生員捐穀準作監生
有於歲科考之前該州縣給發倉收者準其免
考其雖經報捐尚未交完未經給倉收者仍照
例考試○十年

諭直省文武生員三年歲考一次若臨場不到即行
黜革其遊學患病取結開報限三月內補考違限

者分別降黜定例綦嚴近聞各處士子任意遷延
屢次欠考此風漸不可長嗣後凡繫告假生員其
上屆開報下屆果繫遊學未歸患病未痊該學官
察驗確實詳請展限一疾病痊回籍即送補考如
欠至三次以外不準展限竟行黜革倘有扶同捏
報不詳請展限者該學政將教官叅處以專責成

欽此

一廩增名額順治四年定直省各學廩膳生員

府學四十名州學三十名縣學二十名衛學十
名增廣生員名數同。五年設遼學置廩生八
十名諸生均就順天府考試。九年題準漢軍
廩膳增廣生員各二十名不拘旗分歸并順天
府學其廩生均有圈撥地畝不給廩餼。又題
準幫補廩增新舊相間以考案為新丁憂起復
病痊考復停降考復緣事辨復者為舊無新盡
舊無舊盡新總以考案先後為主如第一是新

則先新後舊第一是舊則先舊後新丁憂以下
四項考居一二等均照名次先後為序即起復
亦不問服闋先後惟考居三等先盡丁憂起復
次病痊考復次停降考復次緣事辦復挨次序
補如起復等項有一二人同時候補者以文到
日先後為序文同到者以原補廩增先後為序
若考後有起復準復者序於與考之後不得攙
越凡遇廩增有闕該學教官於次日即開明廩

增某人某月日某事故見闕應補上首補過某
項某人今該補某項某人下首見有某項某人
候闕取具本生及上首下首生不致攙越賄屬
結狀加結申提調官覆勘無礙申文詳奪若該
學留難不報至三日以上提調官遲至七日以
上吏皆究處其增廣補廩遺下增闕湏前詳批
允後方許作闕呈詳項補不得兩項並申如有
朦朧攙越者事發教官以贓論本生黜革保結

生降罰○十三年題準直隸永平府寄學內廩額八十名分四十名歸遼陽府學遼海二縣每學先設廩生五名竝人才漸充仍照縣學增設○十六年題準湖南辰州五寨建學設廩膳生六名增廣生八名○又題準貴州大學設苗籍廩增各三名中小學各一名○康熙九年題準奉天府州縣學各設廩膳生員一名○十年議準滿洲蒙古亦照漢軍例設廩膳增廣生員各

二十名○二十四年覆準錦州府錦縣寧遠州
每學增設廩生五名廣寧縣加設廩生二名增
生照廩生名數○二十六年覆準直隸懷來永
寧保安三衛照衛學例設立廩膳增廣生員○
二十八年覆準貴州貴筑縣照縣學之例設廩
增生員○又議準滿洲蒙古設廩生增廣生各
二十名漢軍各十名○三十一年雲南馬龍寧
師宗三州呈貢定邊元謀三縣貴州安化縣各

照州縣學例設廩增生員○三十二年覆準湖
廣五開衛照衛學例設廩增生員○四十年覆
準錦州學向設廩增各五名照承德縣加五名
廣寧縣學向設二名加一名錦州府寧遠州遼
陽海城二縣各學向各設五名均加二名蓋平
鐵嶺開原三縣學向設一名各加一名○四十
四年覆準陝西平涼衛取進童生改撥府學其
廩增不分民衛照考案先後序補○四十九年

覆準奉天八旗廩增名數滿洲各四名漢軍各
二名○五十二年覆準廣西西隆州設廩生四
名增廣生五名○五十五年覆準湖廣岳州府
洞庭湖西六屬於澧州別建考院府學廩增令
各分一半○又覆準廣東衛所取進童生撥入
各府學其廩增即附各府學額內○雍正二年
議準八旗童生入學額數倍於外府州縣而廩
增額數獨少宜為酌加滿洲蒙古廩額定六十

名漢軍廩額定三十名增生額與廩生同 又

覆準

盛京滿字號既取進十名合字號取進六名其廩
增著照二名取一之例滿號各加二名共六名
合號各加一名共三名○三年覆準廣西太平
土州蒞兩經歲科考後生員額多量設廩二名
增三名貴州南籠廳設學已經十年照例設廩
額二十名○四年覆準山西新升之朔平寧武

二府學設廩增各二十名右玉偏關左雲平魯
四縣學及大同府屬之陽高天鎮二縣學應設
廩增各照縣學之例寧武府屬之寧武縣學
十年再議○五年議準陝西新設潼關縣廩增
額照縣學例各設二十名○又覆準河南柘城
縣裁歸延津原設兩縣學廩膳生員共四十名
遇闕應停頂補
遇缺扣去二十名後始聽頂補○
又覆準湖廣鎮谿所酌設廩增各四名○又覆

準湖北施州衛升為恩施縣應照各縣學例將
原設廩增四十名之數各裁去二十名○又覆
準四川成都縣學舊設廩增各二十名今分設
華陽縣應令兩學中分各半威州裁歸保縣應
於保縣學設廩增各二十名其威州舊有之廩
生三十名即附於保縣學食餼所出廩闕不準
頂補增附生於歸并後考列優等與保縣學生
員序補廩增馬湖府學舊設廩生四十名暫準

於歸并敘州府之屏山縣照舊食餼闕出不準
頂補竝扣至二十名之時方準頂補○八年覆
準四川新津郫新繁德陽梁山五縣原額廩增
均各二十名與新設之雙流崇寧彭羅江新寧
五縣平分各得十名綿州原額廩增各三十名
三分其一與新設之彰明縣眉州原額廩增各
三十名分與新設之青神彭山二縣各八名奉
節縣原額廩增各二十名分與新設之大寧縣

各七名榮縣原額廩增各二十名與新設之威遠縣中分各半蒞人文充盛之日學政具題再議○九年覆準河東運使學舊設廩增各四十名今冒籍改歸人數較少裁廩增各二十名盡先補者留實廩實增各二十名餘改候廩候增○十年覆準直隸新升之天津府照府學例設廩增各四十名附府之天津縣照縣學例設廩增各二十名原設州學廩增各三十名酌留二

十名於縣學餘撥入天津府學寶坻縣分設寧河縣廩增仍照舊額增設寧河學廩增各二十名○又覆準湖南澧州改為直隸州應將澧州六屬從前撥入岳州府學各生按其籍貫令州籍者歸州學縣籍者歸縣學其廩增改候廩候增與本州縣生員照考案先後挨次序補又九谿永定二衛歸并安福縣應將二衛原額廩增各二十名盡先補者每衛存實廩增各十名以

符縣學二十名之數餘改為候廩候增其二衛
舊生散在澧州等處者照依戶口田糧撥歸本
籍○又覆準長蘆所設商竈籍改歸天津府學
設廩增各二十名先盡年深者補足餘作候廩
候增○十三年覆準奉天府永吉州學額設廩
增各一名○又覆準江南江都縣原設廩增各
二十名與分設之甘泉縣學中分各半山陽縣
學原設廩增各撥六名鹽城各撥四名歸分設



之阜寧縣學山陽仍留廩增各十有四名鹽城
各十有六名阜寧撥入廩增各十名○又覆準
江南新升之徐州府學設廩增各四十名附府
之銅山縣學設廩增各二十名其州學原設廩
增各三十名酌留二十名於銅山縣學餘十名
改入徐州府學○又覆準廣西崇善縣為太平
府首邑自雍正三年設學以來未定廩增額數
應設廩增各四名○又覆準山東武定州沂州

升府均設廩增各四十名新設附府之惠民蘭
山二縣均設廩增各二十名原設州學廩增各
三十名均酌留縣學二十名餘十名歸入府學
原州學文武生員令武定沂州二府學與惠民
蘭山二縣學各半分隸○又覆準山東益都縣
分設之博山縣設廩增各二十名其由益都淄
川萊蕪三縣改隸博山之實廩實增即按原補
年月撥入新設額內候廩候增與本學生員論

考案名次新舊間補○又覆準安徽壽州學原
設廩增各三十名今分設鳳臺縣酌分十二名
入縣學州學文武生員與縣學四六分隸○又
覆準河南陳許二州升府均設廩增各四十名
原設州學廩增各三十名酌留縣學各二十名
餘十名撥入府學○又覆準福建新升之福寧
府學設廩增各四十名附府霞浦縣學設廩增
各二十名古田縣原設廩增各二十名與分設

之屏山縣中分廩增各十名永春縣升州與龍
巖州均照州學例設廩增各三十名臺灣府彰
化縣設學已久文風日盛設廩增各十名○乾
隆元年覆準河南南陽縣分設之南召縣學設
廩增各二十名○又覆準陝西同州升府設府
學廩增各四十名設大荔縣學廩增各二十名
原設州學廩增各三十名酌留二十名於縣學
餘十名歸入府學○又覆準湖北新設之宜昌

府設廩增各二十名原設彞陵州學廩增各三十名酌留二十名於東湖縣學餘十名歸於宜
昌府學州學文武生員令宜昌府與東湖縣各
半分隸其從前彞陵州撥入荊州府學生員改
歸宜昌府學○又覆準山東曹州泰安州升府
均設廩增各四十名附府之沂澤泰安二縣均
設廩增各二十名原設州學廩增各三十名均
酌留二十名於縣學餘十名歸入府學原州學

文武生員令曹州泰安二府學與潯澤泰安二縣學各半分隸○二年覆準河南南陽縣學原設廩增各三十名今分設南召縣別設廩增各二十名應減去南陽縣廩增各十名以符縣學之數如減去十名內有應撥南召縣者即補入新設二十名額內若籍隸南陽將年分淺者作南陽縣學候廩候增按考案新舊間補○又覆準安徽潁州升府府學設廩增各四十名新設

之阜陽縣學設廩增各二十名原設州學廩增各三十名酌留二十名於阜陽縣學餘十名歸入潁州府學不敷之廩額將鳳陽府撥歸潁州並各縣學之廩生十四名撥入府學新設四十二名額內○又覆準山西朔平寧武政府已久人文漸盛應照州學例加設廩增各十名足三十名之數神池五寨二縣學與寧武縣學均設廩增各二十名○三年覆準湖廣永定縣設廩生

六名其慈利縣撥歸之生既改為候廩則永定
優等生員人多額少難於幫補將慈利縣學撥
出空廩六名歸永定縣學又永定縣學未設增
生將慈利縣學撥出空增六名歸永定縣學嗣
後慈利縣學設廩增各十有四名永定縣學設
廩增各十有二名○又覆準湖南新設之沅州
府所屬止三縣廩增額數照府學例減十名各
設三十名又從前沅州黔陽麻陽撥入府學之

廩增附生武生均歸沅州府學原設州學廩增各三十名酌留二十名於芷江縣學餘十名歸沅州府學○又覆準廣東設嘉應州以來入學額數已照大學例取進二十名廩增尚仍舊額二十名應加增各十名以符州學之數○又覆準貴州南籠州照州學例設廩增各三十名○又覆準廣東商籍生員向分撥廣州府及南番二縣學商籍所補廩增即在三學民籍廩增之

內有妨民籍應照直隸天津府例將三學商籍生員悉歸廣州府儒學考課原取進廣州府八名南海番禺二縣各六名仍照舊取進設商籍廩增各十有五名均撥附府學若應撥廩增浮於商學額設之數先盡年深者補足十五名其餘作為候廩候增俟將來考居優等與優等附生照例新舊間補○又覆準雲南宣威州自雍正八年設學額進八名又由貴州威寧州撥歸

生員一百四十餘名內原有廩生二十餘名自應準設廩額但該學生員未及二百人尚非人文充盛之地應照縣學例設廩增各二十名將見由威寧州撥歸之實廩充補其虛廩與本學生員照考案名次新舊間補增生亦照此例○又覆準直隸新設臨榆縣學設廩增各二十名○又覆準福建霞浦縣學原設廩增各二十名與分設之福鼎縣學中分各十名○又覆準廣

東鶴山縣設廩增各十名先盡新會開平二縣
原撥之舊廩四名補實餘以考列優等者序補
○又覆準廣西泗城鎮安二府學均設廩增各
四名歸順州學設廩增各二名○五年覆準廣
東豐順縣學照例設廩增各二十名其由嘉應
州海陽揭陽大埔三縣隨地撥歸豐順縣學之
實廩照例食餼候廩照考案新舊間補○六年
覆準四川樂山三臺二縣原繫州學設廩增各

三十名改縣以來尚仍其舊今樂山升嘉定府
三臺升潼川府均酌撥廩增各十名歸入府學
餘留縣學以符縣學廩增各二十名之例○七
年覆準黔省永豐州自雍正十二年建學至今
未設廩增應準其各設二名○八年覆準甘肅
口外安西等五衛設學設廩增各三名○又覆
準山東商籍設廩增各五名○九年覆準雲南
東川昭通二府及鎮雄州永善縣每學設廩增

各八名於歲科兩試優等內序補○十二年覆
準四川岳池縣學設廩增各十名○十三年覆
準湖南永順府學設廩增各十名所屬之永順
龍山保靖桑植四縣學各設廩增各六名埃人
文充盛再議加增○又覆準永吉州學歸同知
管轄廩增額設仍舊○又覆準雲南鎮沅府學
設廩增各十名普洱府學恩樂縣學黑白琅三
鹽井學均設廩增各八名○十五年覆準廣東

鶴山縣學加設廩增各五名共設廩增各十有五名○十六年覆準山東靈山衛學歸并膠州原設衛籍廩增各三十名減去八名酌留年深者八名餘為候廩候增照考案新舊間補○十七年覆準廣西永寧州學原設廩增各三十名從前因寄籍改歸本籍存廩無幾改為三年一貢但廩額未裁仍陸續補足出貢必致阻滯嗣後有病故褫革者即扣去不補竝裁至二十名

後遇闕仍補○又覆準四川眉州及青神彭山
二縣學均加設廩增各三名眉州定為十有七
名兩縣各定為十有一名○十八年覆準四川
成都華陽二縣學均加廩增各五名定為十有
五名

一貢士成均順治元年

恩詔直省府州縣學均以本年正貢改為恩貢次貢作

正貢○又

諭首舉選貢掄才盛典準先行歲考補足廩生以拔其尤順天府特貢六人每府學貢二人州縣學各貢一人其考試盤費官為資給如有拔萃竒才特疏薦舉欽此○又題準在外府州縣學廩生赴學政考試選貢來京以學達經濟行合規矩者方為及格○又題準拔貢定例彙通省廩生於貢院中兩場考試士子跋涉艱辛令聽學政於所至之地便宜考試○二年題準直省起送貢生府學

每年一人州學三年二人縣學二年一人各省
學政將印結單卷由布政使司起送直隸學政
由各府起送黏連府州縣學印結各單內均用
印鈐蓋該學政仍將貢生姓名造冊送部○又
題準直省府州縣學不拘廩增附將文行無優
者大學起送二人小學一人入監肄業名為貢
監○又題準貢生

廷試以三月十五日吏禮二部官同翰林院官赴

內院公同閱卷定序○三年題準直省歲貢生
於每年四月十五日

廷試該學臣照例考定給單起送限三月內到部
如過期者候次年補試○四年題準學政每歲
將次年應貢生員屢經科舉者三人一正二陪
詳加考選如年已衰老文理荒疎令其告老取
陪貢充選再不得人更取其次陪貢務於挨序
中仍寓遴才之意其有停廩降廩科歲考居三

等者亦許收復未收復者不許起送其應貢者
定限次年三月到部如有濫充於所送內發回
五名以上學政照例罰俸○又議準由部會同
內院將見在貢監生嚴加考試除選取存監外
其餘革去貢監發回原學分別照廩增附肄業
及行學黜名有差○是年頒起送貢生
廷試單文新式通行直省提學○五年設遼學每
年起送貢生三人○八年

恩詔各直省儒學準恩貢一名以正貢作恩貢次貢作
歲貢○又題準

廷試貢生由部會同內院吏部於四月十五日起
天安門外橋南行禮考試畢會同閱卷定序送吏
部出榜其考試人數當日奏

聞○九年題準漢軍每年起送貢生二人○又題準
本年已考正貢遇有事故出闕繫人文未經到
部在一年以內者將原給批咨硃卷追繳挨次

取年力强壯文學優長者一人補貢定限於應
貢年分次年到部方準收考如將年遠貢闕濫
補市恩者起送到部即將本生發回革廩肄業
學政叅究○又題準歲貢正陪務以屢經科舉
者仍以食餼年深為序同補則以原考案為序
除停廩未復者緣事住食廩餼者服闋及告病
給假過限不補考者服滿未補而緣事者停降
未復而丁憂者皆扣算作曠外其餘槩不作曠

停降考復緣事辨復者以文到日為始準其實數降增而復補廩者準前後通算就中較其食餼以年月最深者為正貢其次以是為差每遇考期文到提調官即取教官廩膳里鄰合例甘結備造年貌籍貫科舉次數起送考選如值出巡遇便投考考取領文日即開廩作闕若已領硃卷而丁憂患病者仍作正貢如一年內人文未到部而病故或問革者有司將原領卷單追

繳別送考選如領過盤費問革者追病故者免
若於考後衰老荒疎不堪充貢者同致仕例不
補貢內有捏增科舉隱匿停降及受賄讓貢及
爭貢者黜革起送官吏一并察究○十一年題
準直省考貢限一日內考經書策論四篇務取
明通淹貫之士照題定科場解卷限期將原卷
印封解部磨勘不許轉發謄紅以致改竄文字
卷有荒謬者由部會同禮科指叅○又題準直

省儒學廩生內通行考試經書策論拔取學行
兼優者一人充貢送部學政將各生原卷解部
仍令本生謄錄硃卷黏連貢單於布政使司起
文取該府州縣學各印結齎送投部彙送內院
以候

廷試各學政仍將拔貢生員姓名籍貫備造文冊
報部○又題準隨征廩生準作貢監生員有軍
功二等準作監生更有軍功二等準作貢生此

外有軍功作紀錄○又議準

廷試公閱後將恩拔貢生及歲貢生中英年願入
監肄業者一并送監依期坐監吏部會同內院
本部公考以定職銜○十三年題準遼學生有
原寄永平府學者準與遼陽府學一例每年各
貢一人遼海二縣學二年各貢一人○十五年
題準歲貢生於部內過堂時詳看年力強壯者
方準送監○十六年題準

廷試貢生試卷用翰林院印御史二人分東西班
監試兵部撥步軍尉兵丁赴

長安左右門看守工部鋪設考官坐案光祿寺備
執事官飯十席並貢生供給鴻臚寺官於

天安門外引禮鑾儀衛撥校尉赴考處搜檢看守
北城兵馬司備官版四書五經網鑑

大清律送部應用均由部咨劄行取○又題準湖
南辰州五寨既經設學二年貢一人○十七年

題準貴州省屬苗生新進者少暫令附大學者
三年貢一人附中小學者五年貢一人別立一
冊將苗生挨年序貢勿與府州縣學額數相溷
俟入學人多始照州學舉行○康熙元年題準
貴州雲南貢生暫免

廷試貴州咨送吏部就近改補教職雲南咨行該
撫就近考試將試卷封送吏部校閱定銜序選
○九年題準奉天府府州縣學各五年一貢○

十年題準直省各學於見考一二等生員內遴
選文行兼優者考充拔貢入監肄業○又議準
滿洲蒙古亦照漢軍例每年貢二人○又議準
八旗新舊生員通行選拔滿洲蒙古二名漢軍
二名入監肄業○十四年

恩詔直省儒學準以正貢作恩貢次貢作歲貢○二十
三年議準雲南蕩平後歲貢生暫就本省考試
試卷解送到部閱定次序移咨吏部其願就

廷試者聽○二十四年覆準錦州府錦縣寧遠州
三學各二年一貢廣寧縣五年一貢○又議準
直省各學於見考一二等生員內遴選文藝精
醇品行端方者府學二名州縣學各一名準為
拔貢入監讀書如該學無文行兼全者寧聽闕
額其試卷解部磨勘如察出冒濫者將考官糾
叅○又議準監生止有輸納一途貧窶之士無
由觀光將各儒學生員選其文行兼優者準作

貢監府學二名其餘各學一名起送赴監如該
學無文行兼優者寧闕毋濫其試卷解部磨勘
察有冒濫將考官糾叅○二十六年覆準直隸
懷來安寧保安三衛仍各設學照縣例出貢
又覆準直省歲貢槩免來京

廷試著各學政挨序考準咨部補授訓導捐納歲
貢亦聽考送補授願入監肄業者學政給文送
部劄監○二十八年覆準貴州貴筑縣生員照

縣學例出貢○又題準滿洲蒙古每年貢二人
漢軍每年貢一人○三十一年覆準雲南馬龍
寧師宗三州呈貢元謀定邊三縣及貴州安化
縣生員均照州縣學例出貢○三十二年覆準
湖廣五開衛生員照例挨年出貢○三十三年
覆準宣化府學及宣化懷安懷來萬全蔚西寧
龍門赤城八縣學照例挨年出貢○三十六年
題準各省歲貢願入監者停學政起送從本州

縣給文準其人文到監肄業○是年

恩詔直省儒學準以正貢作恩貢次貢作歲貢○又題
準照康熙二十四年例選拔貢生府學二名其
餘各學一名滿洲蒙古二名漢軍一名如無文
行兼優者寧闕毋濫○三十七年題準三十六
年

恩詔以正貢作恩貢次貢作歲貢應以本年遇

詔之正貢改作恩貢次貢充本年歲貢至歇貢之年仍

不準起送通行各學政已經起送本年歲貢到部者移咨吏部改注恩貢該學政換給恩貢單其已經起送本年分歲貢者學政即改作恩貢造冊送部其歲貢皆遵

恩詔照例挨考一名充本年分歲貢○三十九年議準嗣後選拔之年以陪貢充停止選拔○四十四年覆準陝西平涼衛生員撥附平涼府學其挨年出貢不分民衛以年月淺深為序○五十二

年

恩詔直省儒學以正貢作恩貢次貢作歲貢○又覆準
廣西西隆州生員起送貢生三年兩次舉行○
五十五年覆準湖廣岳州府湖西六屬湖東四
屬既分建考院其挨年出貢定各輪貢一年○
又覆準廣東諸衛所生員即附入各府學挨年
出貢○六十一年覆準直省照三十六年例再
選拔一次如有冒濫者該學政照溺職例革職

○雍正元年覆準雲南麗江府止設廩生三十名不便照府學廩四十名每年貢一名之例應照州學例三年貢二人○是年

恩詔直省儒學準以正貢作恩貢次貢作歲貢其不值正貢之府州縣衛學準以次貢作恩貢再次貢作歲貢○二年題準涼州衛學生員舊例二年一貢今照州學例三年兩貢○又覆準奉天府學滿字額設廩生六名五年一貢計三十年方

能出貢實為淹滯改令三年一貢○三年覆準
奉天府學民籍生員廩額十名一年一貢未免
太速嗣後照錦州府錦縣寧遠等學之例二年
一貢○又覆準廣西思明府額廩不滿十名一
年一貢左州額廩十名養利州永康州額廩不
滿十名三年一貢未免太驟嗣後均令四年一
貢又太平土州初設學其廩生出貢俟補廩十
年後照縣學例二年一貢○四年覆準山西新

設朔平寧武二府二年一貢其右玉偏關左雲
平魯陽高天鎮六縣挨年出貢均照縣學之例

○五年

諭直省拔貢舊例十二年題請舉行一次朕思各州縣
每年歲貢較其食廩淺深內多年力衰邁之人欲得
人材必須選拔著各省學政於科考時照例府學拔
取二名州縣學各一名寧闕毋濫務取學問優通品
行端方才猷可用之人令其來京朕將親行廷試令

入監肄業如有學問荒陋人品不堪才具庸劣者該
學政嚴加議處嗣後六年選拔一次國子監屆期題
請候旨欽此○又覆準湖廣鎮谿所生員出貢埃補
廩十年後照例二年貢一人○又覆準潼關衛
奉

旨改縣其廩生出貢照縣學例二年一貢○又覆準河
南胙城縣裁歸延津縣兩學見廩四十名照一
縣例二年一貢未免壅滯應於出貢之年準起

送二人竢廩額停補扣清後仍照各縣學例二
年一貢○又覆準復州金州二衛廩生既歸并
山東萊州府學若仍每年一貢未免壅滯將萊
州府學每年貢二名萊州府一名金復二州廩
生輪貢一名竢二衛出貢完日仍照舊每年貢
一人○六年

諭各省考取拔貢原欲遴選儒生以廣教育向例於見
考一二等生員內拔其文行兼優者但作文有一日

短長而文理平通不列優等者其人或品行端方才
猷練達足備國家之用亦未可定嗣後各省學政不
必拘一二三等生員均準收考酌量試以時務策論
其人果有識見才幹再訪其平日品行端方即正考
未列優等亦準選拔蒞到成均仍可學習如此則文
行兼收可以昭廣攬人材之典欽此○七年覆準四
川成都縣分設華陽縣其兩學生員自應輪貢
前二年成都縣貢一人後二年華陽縣貢一人

照此輪轉又威州既歸并保縣所有威州舊廩三十名暫照州學例三年貢二人內有候廩者亦照年分挨貢又馬湖府已經裁汰所屬屏山縣見歸敘州府管轄其府學額廩四十名暫準每年貢一人竢廩額扣至二十名之時歸作屏山縣正額方照各縣例二年出貢一人○八年覆準四川新津郫新繁分設雙流崇寧彭三縣德陽梁山分設羅江新寧二縣榮縣奉節分設

威遠大寧二縣其生員出貢照縣學二年一貢之例新舊縣輪流出貢又錦州分設彰明一縣照州學三年兩貢之例於應貢之年州貢二名後縣貢一名周而復始眉州分設青神彭山二縣照州學三年兩貢之例州貢一名後青神縣貢一名州再貢一名後彭山縣貢一名亦周而復始○九年覆準山西河東運司學生員照縣學之例二年一貢○又覆準江西棚民取進入

學以後挨廩出貢與本籍生員一例遵行○十二年覆準直隸天津州改為府府學生員竢十二年後照例一年一貢又寶坻分設寧河縣額設廩生竢十二年後照例挨年出貢又天津縣學廩生應照縣學例二年一貢○又覆準湖南岳州府學廩增各生既改歸澧州及屬州各縣應較其補廩先後與本州縣生員序貢又九谿永定二衛歸并安福縣其廩生照縣學二年一貢

之例挨次輪貢○又覆準直隸天津府商竈二籍廩生遇應貢之年仍準照例出貢○十一年題準各省優生令該學政出具考語具題送部從前止議升入太學並未分晰貢監名色以致一切考試錄用皆無著落今擬優生由廩增升入太學者準作歲貢由附生武生者準作監生皆由部換給執照劄監肄業奉

旨各省保送優生廩增準作歲貢附生準作監生該部

劄監肄業其武生到部時禮部考試文藝兵部考試
騎射請旨○十二年覆準奉天府復州學廩生三年
一貢金州學五年一貢○又覆準陝西紫陽山
陽商南三學廩生已數原額自本年起準其二
年一貢石泉鎮安二學見在廩生十四名十三
名不等暫準其三年一貢平利白河二學見在
廩生十名九名不等暫準其四年一貢此四學
統竢廩生陸續補足二十名之數仍準照例二

年一貢○十三年覆準奉天府永吉州廩生五
年一貢準於設學之年起算○又覆準江南江
都分設甘泉縣見在食餼之廩生半撥甘泉應
統計二縣廩生食餼先後照縣學二年一貢之
例挨次輪貢俟所撥舊廩出貢完後兩縣新補
廩生各準其四年一貢又山陽鹽城二縣分設
阜寧一縣其見在山陽鹽城分撥阜寧之廩生
應各於所撥之縣挨次二年一貢俟分撥舊廩

出貢完後新補廩生山陽鹽城各五年二貢阜
寧四年一貢○又覆準江南徐州升府新設之
學廩額未能一時補足俟十二年後照府學例
一年一貢其銅山縣學廩生照縣學例二年一
貢○又覆準廣西崇善縣學太平土州及西林
縣學新補廩生均俟十年後方準出貢嗣後定
四年一貢○又覆準山東益都分設博山縣其
益都縣學照舊例二年一貢博山縣初設廩額

竝補足日照縣學例出貢又武定州沂州均升
府竝十二年後廩額補足時照府學例一年一
貢新設惠民蘭山二縣各照州學例二年一貢
○又覆準江南壽州分設鳳臺縣州學準其二
年一貢縣學準其三年一貢○又覆準河南新
設陳州許州二府學竝十二年後廩額補足時
照府學例一年一貢新設淮寧石梁二縣照縣
學例二年一貢○又覆準福建福寧州升府照

府學例一年一貢又新設霞浦縣俟廩額補足之日照縣學例二年一貢又古田分設屏南縣仍照縣學二年一貢之例論年分淺深兩縣輪流出貢又永春縣升州照州學例三年兩貢又臺灣府彰化一縣新設廩額俟十年之後準四
年一貢○是年

恩詔直省儒學均於本年以正貢作恩貢次貢作歲貢○又題準直省歇貢之州縣衛學仍於次年

舉行○乾隆元年覆準河南南召縣竢廩額補
足日照例二年一貢○又覆準廣西西隆州學
額廩四名見在三年兩貢思恩縣學額廩五名
見在二年一貢未免太驟應照左養永之例四
年一貢又上思池河永安修仁來賓羅城天河
遷江八縣及永寧州額廩多未補足應照奉天
府滿字號之例三年一貢○又覆準陝西同州
升府竢十二年後廩額補足日一年一貢其大

蕩縣照例二年一貢○又覆準湖北宜昌升府
俟十二年後廩額補足時照府學例一年一貢
彝陵州新改為東湖縣照縣學例二年一貢○
又覆準山東曹州泰安州均升府俟十二年後
廩額補足時照例一年一貢其新設潯澤泰安
二縣各照縣學例二年一貢○又覆準飭令各
學政選拔貢士務秉公考校拔取文行兼優之
士不得委任教官開奔競之門到部時仍遵例

奏請

欽命大臣考試分別等第如有文理荒謬者本生褫革該學政交部嚴加議處考列一等二等者九卿會同簡選由部引

見其中果有卓越之才自仰邀

簡用其三等者停其簡選照例劄監肄業凡宗學義學教習即於此中考取三年期滿以知縣銓用其肄業期滿者俟吏部照例銓選○二年覆準

安徽潁州升府又設阜陽一縣潁州府學竝廩額補足時先將鳳陽府撥歸之廩生較其食餼先後照例一年一貢其餘年分淺者亦準其陸續挨貢阜陽縣學照例二年一貢○又覆準山西朔平寧武二府人文漸盛照州學例三年兩貢又神池五寨二縣人文漸盛準與寧武縣均二年一貢○又奏準嗣後拔貢到部停其簡選

引

見仍由部奏請

欽命大臣考試劄監肄業如有文理荒謬者本生及該學政照例議處其肄業貢生竣三年期滿其中果有經義治事精通練達人品卓越學識醇正者祭酒等官覈實保薦引

見以知縣教職

簡用其餘仍照例以教職輪班序選○三年覆準湖廣慈利永定二學生員準於本屆科案廩增補

足時下次歲考後二年一貢○又覆準湖南沅州改為府治止轄三縣竝十二年後廩額補足時照州學例三年兩貢其新設芷陽縣照縣學例二年一貢○又覆準廣東商籍生員既設商籍廩生應照天津濟南二府例遇挨貢之期均照民籍縣學例○又覆準府州縣學廩生已經考取歲貢給有貢單於未經報部本生物故者即於報冊內聲明達部準作貢生以示矜卹其

本年歲貢仍將陪貢頂補所有旗匾銀仍給頂補之生○四年覆準嗣後舉報優生除將實行注册外應並注明通曉何經或五經三經拔貢應試經解一道將

御纂諸經中摘取先儒異同之說令其條分縷晰一同解部○又議準近來各省學政題請升入太學之優生歲漸加多而所開事實與尋常獎勵之生無甚懸殊者未免濫冒嗣後舉報優生升入

太學者除確訪實行考試經義外並限以大省
無過五六名中省三四名小省一二名該學政
詳慎舉報如不得其人寧闕毋濫仍於任滿彙
題到日由部覈實具題○又覆準雲南宣威州
學暫照縣學例二年一貢又雲州額進生員十
二名額廩三十名惟出貢照縣學之例二年一
貢嗣後應照州學例三年兩貢○又覆準山海
衛改為臨榆縣應照縣學例二年一貢○又覆

準福建霞浦分設福鼎縣仍照例二年一貢將
年久廩生照考案名次輪流出貢如上屆霞浦
貢一人下屆福鼎貢一人○五年覆準廣東豐
順縣學由嘉應州海陽揭陽大埔三縣學撥入
之舊廩鶴山縣學由新會開平二縣學撥入之
舊廩均按年先準出貢新補本學廩生竝十年
後準三年一貢○又覆準廣西泗城鎮安二府
及歸順州學新設廩生竝十年後府學三年一

貢州學四年一貢○又覆準雲南向來歲貢必
繫實廩虛廩雖年深亦不準貢與各省例不符
嗣後遇應貢之年不論虛廩實廩挨年序貢以
昭畫一該學改造冊送部察覈○七年

諭國家科目取士之外又有拔貢一途所以收未盡
之人才以備用也我朝教澤涵濡人文日盛又屢
開恩科加增中額是以進士濟濟多人舉人則日
積日衆竟有需次多年而不得一官者朕為此時

廩於懷屢籌疏通之策若又拔貢以分其選用之途數年一次舉行則人愈多而選用愈少舉人需次更遥遥無期矣朕思拔貢乃生員中之優者既為文學華瞻之青衿則應科舉時自可脫穎而出又不專藉選拔以為進身之階也從前選拔或數十年一舉或二十年一舉今則六年一舉為期太近理應酌量變通嗣後著十二年一舉定為例欽此○又議準嗣後考取歲貢經書判令隨時出

題不必通省同題○又覆準貴州永豐州學新
設廩生竝十年後準四年一貢○八年覆準雲
南東川昭通二府及鎮雄州永善縣學新設廩
生竝十二年後府三年一貢州四年一貢○又
覆準山東商籍廩生竝十二年後五年一貢○
又覆準甘肅口外安西等五衛廩生竝十二年
後六年一貢○又覆準各省拔貢自乾隆二年
停止簡選引

見其中領咨到部者日少一日前因士子苦於守候積至二三十名即奏請

欽命大臣考試今各省拔貢未到部者尚數百名雖積至十餘名其先到者因資斧告竭又復回籍再難積至二三十名若十餘名即奏請

廷試殊於體制未協切思拔貢見例無論考試一二三等均歸國子監肄業嗣後凡拔貢到部由
奇驗到即劄國子監會同考試文理通者準為

拔貢留監肄業荒謬者即行褫革如文理雖不
荒謬而辭句疵累不稱拔貢之選者發回原籍
肄業仍將該學政分別議處○十二年覆準四
川岳池縣學新設廩生竢十二年後準三年一
貢○又覆準永吉州學歸同知管轄廩生照舊
出貢○十三年覆準湖南永順府及所屬永順
保靖龍山桑植四縣學新設廩生竢十年後府
二年一貢縣三年一貢○又覆準陝西潼關縣

裁歸同知管轄縣學見在之虛廩實廩留於廳
學二年一貢埃三次歲考之後存廩十五名三
年一貢○又覆準雲南普洱鎮沅二府恩樂縣
及黑白琅三鹽學新設之廩生埃十二年後出
貢○又覆準山東威海靖海二衛生員歸并文
登縣學文登額設廩生二十名威海靖二衛歸并
各二十名作為候廩人多額少挨補無期二年
一貢壅滯尤甚應暫準一年一貢首文登縣本

籍廩生次威海衛歸并廩生次靖海衛歸并廩
生周而復始竝二衛廩生貢完仍照縣二年一
貢○十五年

恩詔直省儒學以正貢作恩貢次貢作正貢○又覆
準廣東廉州府學廩生三十一名一年一貢羅
定州學廩生二十名欽州學廩生九名皆三年
兩貢與定例未協嗣後廉州府學三年兩貢羅
定州學二年一貢欽州學四年一貢○十六年

恩詔直省儒學以正貢作恩貢次貢作正貢○又

諭各省選拔貢生經朕降旨以十二年舉行惟是來
京朝考簡選引見發監讀書或以知縣等官試用
或以教職即用或以教職歸班序選條例屢經更
定朕思選拔於數十百人之中拔取一二人且不
糊名易書可以驗其人材考其素行自當精擇以
充其選應令該學政於試列前茅之士舉其文行
兼優才品出衆者會同督撫掄採以杜濫冒至庠

序為陶育人材根本今教職率多昏耄龍鍾濫竽
戀棧雖定以六年甄別而上官以閒曹多方寬假
非國家設官敷教本意應分以年限詳加澄汰所
汰之員即以應授教職之選補充補於教士當有
裨益凡選拔貢生赴部驗到作何定限朝考錄用
一應規條應詳悉酌定永著為令大學士九卿集
議以聞遵

旨議準應令直省學政於歲科兩試時凡文理優通

之廩增附生觀其才品接其言論合之文章已
得其大槩至考拔時悉心體訪不得委任教官
以杜奔競照例試以兩場於屢次優等及見列
前茅之士擇其文優品端者秉公選拔即隨場
咨明督撫存案竝科考事竣八月鄉試以前學
政到省錄遺時傳齊通省選拔之人有總督駐
劄之所會同督撫僅巡撫駐劄之地會同巡撫
就學政考院通行覆試一場酌用四書文經文

策各一篇次日就督撫署中會同驗看仍將選拔原卷通行較閱如果文品兼優年力富強即通出一榜該學政給與貢單咨文令其赴部正覆原卷均送部磨勘再順天學政選拔滿洲蒙古漢軍生員應於鄉試前奏請

欽命大臣會同覆試驗看奉天由府丞選拔應會同府尹在公所覆試驗看福建臺灣府由臺灣道選拔移送福建學政會同督撫覆試驗看倘督

撫等別有見聞或驗試不堪充選仍發回原學
肄業至到部之期統以其年十月起限四川廣
東廣西雲南貴州定限八月於次年五月到部
江西福建浙江湖北湖南陝西限六月於次年
二月到部直隸奉天河南山東山西江南限四
月於次年正月到部禮部即照定限奏請

欽命大臣於

午門內考試分列三等進

呈如有文理荒謬不入等之人學政照例議處外
該督撫亦應一并議處至

朝考取列優等復經九卿簡選引

見其中果有人才出眾仰邀

聖鑒或以知縣或以知縣以下等官錄用再直省府
州縣教職飭令督撫三年一次澄汰將實在年
力就衰者勒令休致澄汰員闕即將簡選引

見之拔貢照依

朝考名次先後充補其補授訓導者以教諭銜管
訓導事仍照原銜升轉俟簡選引

見之人用完照舊例銓選未入簡選者仍劄監肄業
悉照舊例遵行○十七年覆準四川成都華陽
二縣學各廩生十五名合兩縣廩額正符州學
廩生三十名三年兩貢之例嗣後三年之內令
兩縣輪流各貢一人○二十三年覆準各省考
試拔貢第二場試以時務策一五言八韻詩一

朝考拔貢試以書藝一詩一各省考試歲貢亦改
判為詩以符體制其優生保題到部由部具奏
請

旨除已經具題之優生照在部考試拔貢例試以書
藝二篇外嗣後保送者均照拔貢

朝考之例試以書藝一詩一文理明通者升入太
學荒疎者發回原學將學臣議處並令各省學
政豫於考試優生時即兼試詩題以昭畫一

一考試文藝康熙三十六年覆準考試童生出
四書題一令作時文小學題一令作論通行直
省遵行○三十九年覆準嗣後學臣考試生童
有將經書小學實能精熟及成誦三經五經者
酌量優錄其孝經論題原少嗣後將太極圖說
通書西銘正蒙一并命題○四十五年覆準儒
童正考時仍四書文二篇覆試四書文一小學
論一○雍正二年覆準嗣後學政歲考用四書

文二篇科考則用四書文二篇加經文一篇如遇冬月日短則用四書文一篇經文一篇其有經旨不明撫拾陳文希圖僥倖不得濫取○六年議準歲試士子令作兩書一經過冬日一書一經科考令作一書一經一策遇冬日一書一策若草率塞責者歲試不準拔在優等科試不準錄送○又覆準嗣後令該學政嚴飭教官季考月課時於書文一篇外或試以策或試以論

務期切近時務通達政治嚴立課程分別優劣
以示勸懲倘教官不實心奉行該學政題叅議
處○又奏準選拔考試分為兩場首場四書文
兩篇經文一篇二場策一道論一篇判一條兩
場全佳再細訪其品行端方應予選拔即首場
文藝僅屬平通而策論果能曉暢古今切中時
務再細訪其品行端方亦準選拔若策論品行
兩無足取首場文藝縱極優長亦不準選拔考

竣將原卷彙送到部細加磨對○又覆準舊例
儒童正考時四書文二篇覆試則四書文一篇
小學論一篇今按小學乃朱子纂輯雖於幼童
有裨究不如聖經言簡意該廣大悉備應令學
臣嗣後覆試儒童將論題小學改作孝經○乾
隆元年

諭

聖祖仁皇帝四經之纂實綜自漢迄明二千餘年羣儒

之說而折其中視前明大全之編僅輯宋元講解
未免膚雜者相去懸殊直省學政職在勸課實學
則莫要於宣揚

聖教以立士子之根柢每歲科按臨時豫飭各該學確
訪生童中有誦讀

御纂諸經者或專一經或兼他經皆開明冊報俟考試
文藝之後就四經中斟酌舊說異同之處摘取數
條另期發問只令依義條對不必責以文采有能

答不失指者所試文稍平順童子即予入泮生員
即予補廩以示鼓勵務宜實力奉行以副朕尊經
育才之至意欽此○又覆準小學一書與性理相
為表裏令該學臣嗣後儒童正考時仍四書題
二道覆試時四書題一道其論題一道孝經與
小學兼出○八年議準各學政歲科兩試及府
試縣試於覆試時用小學命題作論一篇必通
曉明順者方準收取○十七年覆準嗣後令學

政案臨之初即將該提調冊報能對經解之生
童總試一場有能答不失指者於正試卷面上
加以經解印記以便閱正試之文藝即可覈對
經解之卷照例辦理○二十三年覆準各省歲
試書藝一經藝一科試書藝一策一均增五言
八韻詩一考試時學政官豫備韻本以便士子
檢閱自定議之後歲科兩週如詩不佳者歲試
不得拔取優等科試不準錄送鄉試

一釐正文體順治八年題準學政歲科考各分
四次解卷到部會同禮科磨勘所取生童文字
以純正典雅為主如詭怪舛謬者本生黜革學
政叅處凡解卷一次磨勘出四卷以下每卷罰
俸三月至五卷以上每二卷降職一級十卷以
上革職○九年題準說書以宋儒傳註為宗行
文以典實純正為尚其有剽竊異端邪說矜奇
立異者不得取錄○又題準歲科試卷優等以

大學五名小學三名解部磨勘其有詭僻幽險
割裂補綴者磨勘出照題定卷數分別叅處解
卷時必用原本實卷不許改騰潤色解期務照
題定次數不許遲延違者叅處○康熙二年題
準學政每一次解卷內磨勘出一卷者罰俸六
月二卷九月三卷一年四卷降職一級五卷二
級六卷革職○七年題準學政考完兩府即將
原卷解部○八年題準學政行考事後每六月

解卷一次○十二年議準生童試卷停其解部
磨勘○乾隆元年

諭國家以經義取士將使士子沉潛於四子五經之
書含英咀華發摠文采因以覘學力之淺深與器
識之淳薄而風會所趨即有關於氣運誠以人心
士習之端倪呈露者甚微而徵應者甚鉅也顧時
文之風尚屢變不一苟非明示以準的使海內士
子於從違去取之介曉然知所別擇則大比之期

主司何憑操繩尺以度羣材士子豈能合矩矱以
中程式有明制舉之業體備各種如王唐歸胡金
陳章黃諸大家卓然可傳本朝文運昌明英才輩
出熊伯龍劉子壯以後作者接踵莫不根柢經史
自成杼軸足為後學之津梁制藝之科律自坊選
之禁垂諸功令而大家名作不得通行士子無由
覩斯文之炳蔚率多因陋就簡剽竊陳言間以此
倖獲科名又轉相仿效馴致先正名家之風味邈

乎難尋所繫非淺鮮也朕特命詞臣裒集有明及
本朝諸大家時藝精選數百篇頒示天下以為舉
業指南並將入選之文批抉其精微奧窔之處俾
學者了然於心目間用以服膺摩擬再弛坊間刻
文之禁不拘鄉會墨卷房行試牘準其照前選刻
但不得徇情濫觴狂言橫議致釀惡俗朕實嘉惠
士子望各精勤厥業以底大成尚敬體朕意共相
黽勉欽此○又覆準嗣後學政歲科兩試前列十

名試卷仍解送部科磨勘能否文教興起即憑請

旨議敘議處○三年覆準雍正十年

世宗憲皇帝諭考官所拔之文務期清真雅正理法兼

備詳科舉則例

十三年

皇上諭學者修辭立誠言期有物必理為布帛菽粟之理文為布帛菽粟之文而後可行世垂久

詳科舉則

例皆欽遵奉行在案今考官所取之文或不按

題義摭拾子書中怪僻之語以炫新奇致薄植
之人私相仿效而置實學根柢於不問其弊非
小應再飭考官凡歲科兩試及鄉會衡文務取
雅正清真法不詭於先型辭不悖於經義者拔
置前茅以為多士程式如仍有題理毫無發明
但為險僻怪異不可解之語輒得詭遇者經磨
勘官察出即據實叅處磨勘官亦務嚴加校閱
毋得稍有瞻徇○十年

諭國家設科取士首重者在四書文蓋以六經精微
盡於四子書設非讀書窮理篤志潛心而欲握管
揮毫發先聖之義蘊不大相逕庭乎我

皇考有清真雅正之訓朕題貢院詩曰言孔孟言大是
難乃古今之通論非一人之臆說也近今士子以
科名難倖獲或故作堅深語或矜為俳儷辭爭長
角勝風檐鎖院中偶有得售彼此仿效為奪幟爭
標長技不知文風日卑文品日下有闕國家掄才

鉅典非細故也夫古人論文以渾金璞玉不雕不琢為比未有穿鑿支離可以傳世行遠者至於詩賦揆藻敷華雖不免組織渲染然亦必有真氣貫乎其中乃為佳作今於四書文採綴辭華以示淹博不啻於孔孟立言本意相去萬里矣先正具在罔識遵從習俗難化職此之故自今其令各省督學諸臣時時訓飭鄉會考官加意區擇凡有乖於先輩大家理法者擯棄不錄則詭遇之習可除士

風還淳朕有厚望焉欽此

一頒行書籍順治九年題準今後直省學政將
四子書五經性理大全資治通鑑綱目大學衍
義歷代名臣奏議文章正宗等書責成提調教
官課令生儒誦習講解務俾淹貫三場通曉古
今適於世用坊間書賈止許刊行理學政治有
益文業諸書其他瑣語淫辭通行嚴禁○康熙
四十五年

諭朕製古文淵鑑資治通鑑綱目等書皆已刷印頒賜
大臣此等書籍特為士子學習有益而製可速頒行
直省凡坊間書賈有情願刊刻售賣者聽其傳布欽

此○五十二年

御纂朱子全書成頒發兩京及直省刊版通行○五十
三年

諭朕惟治天下以人心風俗為本而欲正人心厚風俗
必崇尚經學嚴絕非聖之書近見坊肆間多賣小說

淫辭鄙褻荒唐瀆亂倫理不但誘惑愚民即搢紳子弟未免游目而盞心傷風敗俗所關非細著該部通行中外嚴禁所在書坊仍賣小說淫辭者從重治罪

欽此○五十四年

御纂周易折中成頒發中外聽其重刊以廣誦習○雍正元年覆準

聖祖仁皇帝欽定孝經衍義一書照康熙五十四年頒朱子全書例發直省刊版通行 三年奏準

聖祖仁皇帝御製律書淵源百卷照周易折中例頒發
中外有情願重刊者聽○八年奏準

聖祖仁皇帝御纂性理精義書詩春秋三經傳說彙纂
每省每書各發二部一部令其重刊流布一部
以備校對○乾隆元年

諭聞

皇祖聖祖仁皇帝

御纂周易折中尚書詩春秋三經彙纂諸書直省雖已

鑄版但士子赴司具呈竦批已不免守候又一人
所請止於一部勢難鳩工刷印是以得書者寥寥
著直省撫藩招募坊賈自備紙墨刷印通行售賣
嚴禁胥吏阻抑需索但使坊賈皆樂於刊刷則士
子自易於購買庶幾家傳戶誦足以大廣厥傳欽
此○又覆準淫辭穢說最為人心風俗之害例
禁綦嚴但地方奉行不力致向存舊刻銷燬不
盡甚至收買各種疊架盈箱列諸市肆租賃與


人觀看若不嚴行禁絕不但舊版仍然刷印且新版接踵刊行實非拔本塞源之道應再通行直省督撫轉飭地方官凡民間淫辭小說有收存舊本限文到三月悉令銷燬如過期不銷燬及開鋪租賃者均照定例治罪又定例如有違禁造作刊行者該管官失於覺察者一次罰俸六月二次一年三次降職一級調用嗣後地方官若任其收存租賃明知故縱者照禁止邪教

不能察緝例降二級調用○三年

諭從前頒發

聖祖仁皇帝御纂經史諸書交直省布政使司敬謹刊
版準人刷印並聽坊賈刷賣原欲士子人人誦習
以廣教澤近聞書版收藏藩庫士子及坊間刷印
者甚少著直省督撫將書版重加修整俾士民易
於刷印坊間有情願翻刻者聽其自便無庸禁止
如

御纂諸書內有為士子所宜誦習著該督撫奏請頒發
刊版流布至武英殿翰林院國子監皆有存貯書
版亦聽人刷印從前內務府所藏各書如滿漢官
有願購覓誦覽者槩準刷印欽此



欽定大清會典則例卷六十九